



UKA 2016/7-3  
Randi Vestergaard Evaldsen  
21.november 2016

**2017 -mi Aningaasanut Inatsisissamut siunnersuut**  
(Aningaasaqarnermut Akileraartarnermullu Naalakkersuisoq)  
(Pingajussaaneerera)

Amerlanerussuteqartut socialistiskiusut aamma naalakkersuisoqatigiit socialistiskiusut aningaasanik atuisinnaanerat Demokraatini annilaarutigaarput. Aningaasanik piginngisatsinnik. Tassunga ilanngutissavarput naalakkersuisoqatigiit anguniarmassuk Kalaallit Nunaata namminersulivinnissaa. Ataqtigiinnngillat.

2017-mut Aningaasanut Inatsisissaq saqqummiukkakku sinneqartooruteqarpoq 33 millioner koruuninik aamma ukiunut aggersunut aningaasarsiornikkut akisussaassuseqartumik ingerlatsinissamut pilersaarut sanasimavarput piffissami 2017-miit 2020-mut aningaasaqarnerput oqimaaqatigiittussanngorlugu.

Oktoberip qaammataani socialistiskiusut pissaaneq tigummassuk allarluinnarmik saqqummiussivigineqarpugut.

2017-mut sinneqartoorutissat ikileriarput 22 millioner koruunit ataattussanngorlugut naak isertitassatut taggitat 55 millioner koruuninik amerleriaraluartut - tamannali inooqataaffigisinnaavarput naak Demokraatini kissaatiginerugaluarlutigu sinneqartooruteqarnissaq, piffissanut ilungersunartunut ileqqaarniassagatta.

Parlattuani piffissami 2017-miit 2020-mut ataatsimut inerera allanngorpoq oqimaaqatigeeriarluni katillugit 145 millioner koruuninik amingartoortoqartussanngorluni. Quarsaarnaqaaq.

Demokraatini paasisinnaanngilarput partiit socialistiskiusut suunngitsunnguamilluunniit aningaasaarsiornermut akisussaassuseqarnissamik takutitsisinnaanngimmata. Qaammat inorlugu sivisussusillip ingerlanerani akisussaassuseqartumik aningaasatigut ingerlatsineq amingartoorujussuarnermut saatipparsi. Nunatta siunissaa pinnguaraarsi.

Demokraatini isumaqarpugut Naalakkersuisut suliniutaasa nutaat ilaat soorlu Dronning Ingridip Napparsimavissuani meeqqanut immikkoortortaliornissaq kusanartuusoq tapersersornarlunilu kisiani atorsinnaanngilaq suliniutit nutaat akissaqartinnagit amingartoorutit annertusarneqaannarmata.

Demokraatini taamaattumik allatut ajornartumik Naalakkersuisut tema 16-mi, tema 17-mi, tema 18-mi, tema 20-mi, tema 23-mi kiisalu tema 24-mi allannguutissatut siunnersuutaat tamaasa naaggaartariaqarpagut. Tamatumunnga pissutaavoq aningaasartuutissatut siunnersuutaasut



akissaqartinneqannginneri. Isumaqarpugut akisussaassuseqanngitsuliornerusoq nutaanik aningaasartuutissanik pilersitsineq siunissami ukiorpassuarni sunniteqartussanik eqqarsaatigeqqaallannguarnagu siunnersuutit qanoq aningaasalersorneqassanersut. Demokraterne er derfor nødt til at stemme nej til samtlige de ændringsforslag som

Demokraatit Aningaasanut Naalakkersuisoqarfimmi issiaqataagallarmata paasivarput partiit allat tamarmik kissaatigigaat ukiut sisamat ingerlaneranni aningaasaqarnermut inatsit oqimaaqatigiilissasoq. Tassani kukkugaatsiarpugut!

Socialistit amerlanerussuteqarlutik Naalakkersuisut issiaviinut inginniariariutaa aningaasaqarnikkut akisussaassuseqarnissaq sumiginnarpaat. Kusanangilaq aamma nunatsinnut akisussaqaq.

Tamatuma saniatigut Demokraatini iluarinngilluinnarparput ingerlatseqatigiiffiit akileraarutaannik appaanissamut pilersaarutaareersut peerniarlugit Naalakkersuisut ersarissumik pilersaaruteqarmata. Tamanna pissaaq tema 18-p ataani, aamma Demokraatini soorunami naagaarumaagassatsinni.

Ingerlatseqatigiiffiit akileraarutaannik appaanerup kinguneranik nunatsinni suliffeqarfiit amerlanerusunik isaatitsilersussaagaluarput kingorna aningaasaliissutigisassaminnik pilersikkumallugit siuariartornissaq suliffiillu. Ingerlatseqatigiiffiit akileraarutaat appartinneqanngitsoorpat nunat allamiut suliffiutaannik nunatsinnut nuutitsiniarnissaq ajornarnerulissaaq. Demokraatini tamanna uggornarluinnartutut isigaarput.

Demokraatini 2017-mi Naalakkersuisut aningaasanik atuinerat nakkutigilluarumaarparput aamma minnerunngitsumik suliniutinut aningaasartuutitalit akissaqartikkumallugit Naalakkersuisut piumassusaat pisinnaassusaallu. Attatiinnarneqarsinnaanngilaq aningaasartuutit amerliartuinnartinnissaat sipaarumassuseqarani. Tamatumunnga atatillugu Naalakkersuisut kaammattussavagut Piujuartitsinissamut siuariartortitsinissamullu pilersaarut misissorluaqqullugu sakkussanik pitsaasunik innersuussimmat qanoq iliortoqarsinnaaneranut aningaasaqarneq patajaallissappat. Aamma eqqaasitsissutigissavarput missingersuusiorfimut inatsisissami piumasaqaataammat ukiut sisamat ingerlaneranni Aningaasanut Inatsisit oqimaaqatigiilernissaat. Taamaattumik Naalakkersuisut aningaasaqarneq pillugu akisussaassuseqarnerusariaqarput atuuffimmi sinnerani qaammammi siullermi takutitanut naleqqiullugu.

Siunnersuutip aappassaaneernnerannut atatillugu Demokraatini oqaatigaarput aappassaaneerinerup pingajussaaneerinerullu akornanni Naalakkersuisut qanoq iliuuseqarnissaat nakkutigeqqissaarumaarlugu. Taamaasiorpugut inernerilu nuannerpallaanngillat. Ingerlatseqatigiiffiit akileraarutaasa appartinnissaannut pilersaarutit unitsinneqarput aamma



Aningaasanut Inatsisissaq ajorseriartinneqarpoq saqqummiunneqarmata allannguutissatut siunnersuutit akissaqartinneqanngitsut. Allannguutissatut siunnersuutit pissutaallutik 2017-mi sineqartoorutissat ikilipput 22 millioner koruunit ataattussanngorlugit kiisalu ataatsimut isigalugu piffissami 2017-miit 2020-mut amingartooruqartussanngorpoq 145 millioner koruuninik. Oqimaaqatigiittoqanngilliunnarpoq.

Demonraatini siuariartornissamat killilersuisumik aningaasarsiornikkullu akisussaassuseqanngitsuliorluni nunap aningaasaqarneranut isiginneriaaseq tapersersorsinnaanngilarput.

Utgqippara; qaammat ataaseq inorlugu ingerlanerani naalakkersuisoqatigiit socialistiskiusut aningaasaqarniarneq mumisippaat, ukiuni 2017-miit 2020-mut oqimaaqatigiikkaluartoq piffissami tassani 145 millioner koruuninik amingartooruteqartussanngorlugi. Aamma peqataanik ingerlatseqatigiiffiit akileraarutaannik appaaniarneq maangaannartinneqarpoq. Paasiuminaappoq akisussaassuseqaranilu.

Demokraatini qulaani taasagut tunngavigalugit inassutigaarput 2017-mut Aningaasanut Inatsissamat siunnersuut itigartinneqassasoq.